

Date – 24/01/2025

Time - 18:30 -18:40Hrs

HEADLINES

- Beti Bachao Beti Padhao (BBBP) kum 10 tlin lawmna leh National Girl Child Day 2025 lawmna hun Mizoramah neih a ni.
- National Voter's Day chu vawiin kham Mizoramah hman a ni.
- Indian Air Force (IAF) kuta Lengpui Airport hmunhma engemawzat Mizoram sawrkarin hlan a tum chu sut leh se an duh thu Lengpui Airport Forum chuan a sawi.



NATIONAL GIRL CHILD DAY

Beti Bachao Beti Padhao (BBBP) kum 10 tlin lawmna leh National Girl Child Day 2025 lawmna pualin vawiin khan Dawrpui Multi Purpose Centre, Aizawl - ah hun hman a ni.

He hun hmanpuitu Chief Secretary Pu Khili Ram Meena chuan kum 2011 Census-a landanin Mipa leh Hmeichhe naupiang inthlauhna chu Mipa naupang naupiang 1000 zelah hmeichhe naupang 918 chauh anih thu a sawi a. Hmeichhe naupangte an dam khawchhuah nan leh humhalh dan tur bakah zirna tha pek dan tur ngaihtuaha hma la turin Beti Bachao Beti Padhao (BBBP) Scheme chu Prime Minister Narendra Modi in January ni 22, 2015 khan Panipat, Haryana ah a hawn thu a sawi a. Mizoramah chuan Siaha leh Serchhip ah Child Sex Ratio a hniam avangin BBBP chu Pilot Project angin kalpui hmasak a nih thu sawiin tun dinhmunah Mizoram district ah Siaha leh Champhai te chu CSR hniamna district a la nih avangin heng district ah te hian ngaih pawimawh hmasak a ngaih thu a sawi bawk.

Women and Child Development Director Pi Zoramthangi Chhangte chuan kum 10 chhunga BBBP anga hmalakna hrang hrang lo awm tawh te leh BBBP thil tumte hrilhhriatna neiin tun dinhmunah Mizoram chu Sex Ratio at Birth rate 956 girls per 1000 boys anih thu sawiin kalkhawmte chu khawtlang nuam tak dina, hmeichhe naupangte duat leh chawikanna kawnga tan la thar theuh turin a sawm a ni.

National Girl Child Day (NGCD) lawmna hunah hian hmeichhe naupang, kawng hrang hranga zirna leh infiamna lama hlawhtlinna nei mi 15 te hnenah chawimawina hlan an ni.

National Girl Child Day pual hian Dist hrang hrangah pawh hun hman a ni.



MNF

Rajya Sabha MP Pu K. Vanlalvena MNF Gen. Hqrs Adviser chuan VC/LC inthlan tur hun sawn chhan chu hripui, tam leh ramri buai ang chi chhuanlam sawi tur ZPM sawrkar in a nei lo a, party rilru pua ram rorelna a ni a ti.

Vawiina MNF Hnam Runa inkhawmah thu sawiin Pu Vanlalvena chuan MNF party chuan ram hmangaihna thinslung puin ro a rel thin a. MNF term liam taah pawh Covid len nasat hma in VC/ LC inthlanna neih zawh vek hman a ni, Covid hrilen avangin thla ruk pawh sei a ni. Congress term ah pawh LC/ VC term pawh tawi a ni ngai lo a ti a, Pu Vanlalvena chuan Kuhva ro ram dang Myanmar atanga lo lut ah MNF mawhpuh a ni a. ZPM an sawrkar hnuah a ngai rengin Kuhvarah ro chu a lo lut reng tho a, MNF hun laia sawiseltute kha an ngawi ta hian a sawisel tute kha an dik lo a ni, a ti a, ZPM chu a inzawrh ang ngeiin an ti tawp ngei tur a ni, a ti bawk.

Thlathar lei tur chungchangah poh sorkar inrawlh lovin, rate tha zawkin an hralh thei ang a ti.

Vawiin hian MNF President Pu Zoramthanga chuan Local Council leh Village Council Inthlan thuchah a tlangzarh a ni.

<><><>

MPCC

Mizoram Pradesh Congress Committee Friday Political Session Congress Bhavan, Aizawla vawiina neihah MPCC Senior Vice President Pu Lalnunmawia Chuaungo chuan thu sawiin, "ZPM party kalphung chu Ram tihchhiata a awm loh nan leh mipuite thlavang hauh nan tun atang chuan an sawi chhuak ve tan tawh dawn a ti.

Mi hausate an hausak belh thur thur ringawt chu ram hmasawna a ni lova, chiang taka kan hmuh chu mipui nawlpui in hma an sawn chuan ramin hma a sawn a ni. Mipui nawlpuiin sum an neih loh a, thil leina tur an neih hleihtheih loh chuan sumdawngte pawhin an tuar thin a. Chuvangin mipui nawlpui kutah sum a luh theih nan NLUP changtlung zawk, chhungkaw tin ten an hlawhtlinpui theih tur Congress party chuan hma lak an tum a ti.

Party Adviser Pu John Siamkunga, Ex MLA pawhin thusawiin 14th Finance Commission hnuaiyah chuan sum reng reng state chan tur ruatsa vek a ni tawh a, a thiam thiam leh a thei thei sawichhuah theih ang a ni tawh lo a. Finance Commission chuan Village Council ten an insem tur kum kal mekah vaibelchhe 76 an pe a, Local Council te tan pawh vaibelchhe 34 vel an rawn pe a, heng zawng zawng hi ruahman sa vek a ni. VC leh LC ah rulling nih kher a ngai lo, an chan tur a in ang vek a ti.

MNF in Kolkatta a Mizoram House, Ballygunge ami chu an hralh a, tunah ZPM in Lengpui Airport hralh an tum leh a, heng te hi thil pawh tak a ni a, ngaihtuah chian a ngai a ni a ti.

<><><>

BJP

BJP Mizoram State Office Political Session ah MLA Dr. K. Beichhua, BJP State Core Group Member chuan thusawiin, tuna Mizoramin Sorkar a hrawn mek chu Budget Session vawihnihna thutkhawm leh hunah chuan enchhin Sorkar a nihna a lang chiang leh zual ang a, enchhin an dawl em tih hi mipui te'n an hre zel dawn a ni," a ti.

Dr. K. Beichhua chuan, BJP chuan Vision mumal tak leh Ram hmasawna tur atana tum mumal tak nei a nih zia a lang chiang a, India ram pum hmasawna tur Manifesto-te hmanga ram tana hna an thawhna hi India ram mipuite hian an chhawr meka, mi retheite leh mi hausate tan pawh nasa takin kan hlawk pui mek a ni, a ti.

<><><>

NATIONAL VOTERS DAY

Govt. Hrangbana College a Department of Political Science, Public Administration leh Electoral Literacy Club tangho chuan National Voter's Day, 2025 vawiin khan an hmang a.

National Voter's Day hi kum 2011 a hman tan niin, kumin National Voter's Day thupui chu "Nothing Like Voting, I vote for sure" (Vote thlak tluka tha a awm lo, Vote ka thlak ngei dawn) tih a ni.

He hunah hian zirtirtu leh zirlai kalkhawm ten thutiam neiin, Electoral Literary Club incharge Miss Lalhruiatluangi'n a kaihrui a. India ram in pumkhatna vawng tur te

leh sakhua emaw hnam emaw avanga hleih nei hauh lova vote thlak zel tur in thutiam an nei.

Zirlai kalkhawm te hi Mizoram a Local Council leh Village Council , february 12, 2025 a inthlanna neih tur ah thutiam tir an ni bawk.

Govt. Champhai College chuan vawiin khan Seminar Hall ah National Voters Day a hmang a. He hun hi Dr.Lalnunpuia Associate Professor-in kaihhruiin he Ni puala thutiam sawi rual a ni.

Hetihlai hian Champhai District a khaw 62 a Village Council Inthlanna chuh tumte hming pekluh te chu endik mek a ni a, Champhai district a khua leh veng tam zawkah chuan kil thuma inchuh a ni dawn a, kil hnih atanga inchuhna tur khaw tlemte a awm bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

LENGPUI AIRPORT FORUM

Indian Air Force (IAF) kuta Lengpui Airport hmunhma engemawzat Mizoram sawrkarin hlan a tum tha tih loh avanga pawl din Lengpui Airport Forum chuan mipuite tana tha lo turah ngaiin hlan lo turin sawrkar an ngen.

Aizawl Press Club-a chanchinthar thehdahtute an kawmnaah Airport Forum Convener Pu Lalthuamliaana chuan, Lengpui Airport la tura Mizoram sawrkarin Airports Authority of India (AAI), Indian Air Force (IAF) bakah Private player a dawr hnuah AAI leh Adani group ten an hnawl avangin IAF-a hlan chu Working Committee ten tha an tih ber avanga Cabinet pawhin a pawmpui tawh a ti a. Lengpui Airport chu IAF kuta hlan pawh ni se, thu delhkilh an neih atanga thlirin Mizoram sawrkarin tih tur tam tak a la neih dawn tho avangin tuna an chhuanlam ber sum hloh chu a kian phah a rinawm loh tih a sawi.

Pu Lalthuamliaana chuan, nikum October Ni 16-a Council of Minister thukhawmin IAF kuta Lengpui Airport hlan chungchang an ngaihtuah tuma an thutlukna mipui hriattura thuchhuah siam a ni lo chu mak an tih thu an sawi a, Kum 2011 khan IAF te chuan Lengpui Airport chu fighter thuhruk nan an dil tawh ni a sawiin, sorkar laipui chuan IAF inkulh nan Lengpui Airport hi an awt viau ni a an ngaih thu a sawi a. Lengpui Airport Forum chuan Airport mipui tana tangkai taka hman chu an dah pawimawh ber thu leh IAF kuta hlan turin nawr mah se sorkarin an pawm tur a ni lo an ti bawk.

He huna tarlan anih danin, Mizoram sorkarin a ruahman dan chuan runway leh Air Traffic Control bakah runway sir lehlam ram zawng zawng IAF in an chang anga, a bak zawng terminal building, security, fire services leh ticketing leh a dangte Mizoram Sorkar kutah a la awm zui ang. Hemi awmzia chu IAF in remchang an tih dan angin an kuta awm, runway leh ATC hi civilian flights atan ahawh tir ve dawn tihna a ni a, hetiang arrangement hi ‘civil enclaves’ tiin an vuah a, Indopui II-na hunlaia sipai airport te civil miten an hmantawm thin an kha a ni an ti. He ruahmanna anga IAF kuta Lengpui airport hlan anih a, runway leh Air Traffic Control an lak chuan Lengpui airport chung a thuneihna zawng zawng IAF kutah

hlan a ni tawh tihna a ni anga domestic flights zawng zawng pawh IAF control na hnuai a awm a ngai tawh ang.



CHAMPHAI DIST

Champhai District AH & Vety. Office buatsaihin Selam khuaah Awareness Campaign on Animal Vaccination cum Free Animal Clinic neih a ni a, he hunah hian ran natna chi hrang lak laka invenna pawimawhzia te inhrilhhriat a ni a, vawk vulhtu ten an vawk vulhte register theuh a pawimawh te inzirtirna neih a ni bawk.

Selam khuaah hian Free Animal Clinic neih nghal a ni a, ran chi hrang hrang 374 enkawlna pek an niin ui a hri venna 21 pek an ni a, vawk 75 zet vawk pul hri (CSF) venna pek an ni bawk.

